

VENDIM
Nr. 165, datë 22.10.2020

**MBI FILLIMIN E PROCEDURËS PËR MIRATIMIN E “KODIT TË MATJES SË
GAZIT NATYROR”**

Në mbështetje të nenit 16, të ligjit nr. 43/2015, “Për sektorin e energjisë elektrike”, të ndryshuar; nenit 4, pika 39, nenit 104, pika 1, nenit 116, pika 4, të ligjit nr. 102/2015, “Për sektorin e gazit natyror”, të ndryshuar; si dhe nenit 15 dhe 26, të “Rregullores për organizimin, funksionimin dhe procedurat e ERE-s”, miratuar me vendimin nr. 96, datë 17.6.2016, Bordi i Entit Rregullator të Energjisë (ERE), në mbledhjen e tij të datës 22.10.2020, mbasi shqyrtoi relacionin me nr. 114/2 prot., datë 16.10.2020, të përgatitur nga Drejtoria e Gazit Natyror, mbi fillimin e procedurës për miratimin e “Kodit të matjes së gazit natyror”,

konstatoi se:

- Referuar nenit 104, pika 1, të ligjit nr. 102/2015, “Për sektorin e gazit natyror”, të ndryshuar, ERE miraton “Kodin e matjes” për sistemet e matjes dhe matjen e gazit natyror, të hartuar nga operatorët e përcaktuar në pikën 1, të këtij neni.

- ERE, në mënyrë të përsëritur, i është drejtuar Operatorit të Kombinuar të Sistemit të Transmetimit, shoqërisë Albgaz sh.a., me kërkesën për draftimin e këtij dokumenti, por në mungesë të një dokumenti të draftuar dhe propozuar nga Operatori, si edhe për shkak të tejkallimit të afatit përcaktuar në nenin 116, pika 4, të ligjit për gazin, ERE draftoi këtë dokument.

- “Kodi i matjes” është tërësia e normave minimale të detyrueshme për matjen dhe regjistrimin e gazit natyror.

- “Kodi i matjes” përcakton kërkesat teknike të ndërtimit dhe shfrytëzimit të sistemit të matjes së gazit natyror, që do të jetë i përshtatshëm për matjen, mbledhjen e të dhënave, regjistrimin e tyre dhe zbatimin e procedurave përkatëse sipas rregullave të tregut dhe marrëveshjeve midis palëve.

- Draftkodi i matjes së gazit natyror u hartua si dokument në zbatim të ligjit nr. 102/2015, “Për sektorin e gazit natyror”, të ndryshuar, dhe si pjesë e veçantë nga “Kodi i transmetimit të gazit” në Shqipëri.

- Drafti i kodit të matjes do të konsultohet me të licencuarit në sektorin e gazit natyror, si dhe me të gjithë palët e interesit.

Për gjithë sa më sipër, Bordi i ERE-s

VENDOSI:

1. Fillimin e procedurës për miratimin e “Kodit të matjes së gazit natyror”.
2. Drejtoria Juridike dhe Zgjidhjes së Mosmarrëveshjeve të njoftojë palët e interesit për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim në ERE brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 45 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrît Ahmeti